

PERUTUSAN

YAB Perdana Menteri Malaysia

Sejak sedekad yang lalu, pembangunan PKS di Malaysia telah melakar arus perjalanannya yang tersendiri. Kita telah menyaksikan momentum pertumbuhan yang konsisten iaitu kekal di tahap lebih tinggi berbanding pertumbuhan KDNK keseluruhan negara. Pada tahun 2015, PKS menyumbang sebanyak 36.3% kepada KDNK berbanding kurang daripada 30% pada tahun 2005, sementara guna tenaga meningkat kepada 65.5% (2005: 56.8%) dan eksport kepada 17.6% (2005: 16.4%). Asas yang mendorong pertumbuhan ini adalah rangka kerja institusi dan dasar yang jelas.

Walaupun tidak semua PKS mampu berkembang menjadi seperti 'Apple' atau 'Microsoft', tetapi secara kolektifnya PKS mewujudkan peluang pekerjaan, meningkatkan pendapatan, mengubah kehidupan komuniti dan menyediakan asas penting bagi syarikat yang lebih besar. Oleh itu, terdapat kesedaran di seluruh dunia mengenai peranan PKS kepada pasaran ekonomi yang berfungsi secara berkesan. Sama seperti di Malaysia, PKS telah menjadi pemangkin utama dalam pertumbuhan ke arah mencapai negara berpendapatan tinggi dan inklusif menjelang tahun 2020. Pelaksanaan enam Program Berimpak Tinggi dan 26 inisiatif lain di bawah Pelan Induk PKS adalah penting dalam mencapai matlamat dan sasaran ke arah 2020.

Hari ini, walaupun persekitaran ekonomi semakin mencabar, PKS kekal menjadi keutamaan kepada Kerajaan. Pada tahun 2015, sebanyak 150 program pembangunan PKS dilaksanakan dengan jumlah dana bernilai RM5 bilion yang telah memanfaatkan lebih daripada 580,000 PKS dan para pekerjaanya. Bukti menunjukkan bahawa walaupun persekitaran perniagaan lembab, PKS kurang terjejas jika dibandingkan dengan syarikat besar. Sepanjang tahun, PKS kekal bertahan, dengan pertumbuhan sebanyak 6.1% berbanding pertumbuhan keseluruhan ekonomi sebanyak 5%. Prestasi yang menggalakkan ini adalah disebabkan beberapa siri langkah proaktif yang telah diambil oleh Kerajaan sejak awal tahun lepas bagi mengurangkan impak kelembapan ekonomi. Pertumbuhan PKS telah disokong oleh permintaan domestik yang berterusan, terutamanya aktiviti penggunaan dan pelaburan serta peruntukan bantuan pembiayaan tambahan.

Sementara itu, pelaksanaan Program Berimpak Tinggi di bawah Pelan Induk PKS yang semakin rancak turut memberi sokongan kepada PKS sepanjang tahun tersebut. Tumpuan yang lebih diberikan kepada syarikat permulaan dan sedia ada untuk menghasilkan inovasi. Ini bukan saja terhad kepada produk atau perkhidmatan yang canggih, tetapi juga inovasi mampu milik untuk golongan terpinggir, iaitu kumpulan yang berpendapatan 40% terendah dalam piramid dan masyarakat luar bandar. PKS yang berinovasi juga mencatat pertumbuhan dua digit dalam jualan dan eksport, dan secara amnya mereka mempunyai produktiviti dan tahap gaji yang lebih tinggi berbanding norma dalam industri. Pembiayaan alternatif baharu telah wujud khususnya bagi memenuhi keperluan syarikat yang inovatif dan berpertumbuhan tinggi, sementara dana bagi usahawan mikro telah diperlebarkan bagi memanfaatkan lebih ramai usahawan.



Fasa pertama bagi Program Berimpak Tinggi 1 telah disempurnakan dengan pelancaran portal informasi baharu yang dipanggil 'MalaysiaBiz'. Portal tersebut menyediakan butiran tentang pendaftaran perniagaan dan keperluan pelesenan bagi aktiviti perniagaan dalam semua sektor perniagaan, seterusnya meningkatkan kemudahan menjalankan perniagaan. Bagi mengukuhkan prospek jangka panjang PKS, Kerajaan juga dalam peringkat akhir merangka Rang Undang-undang PKS Kebangsaan 2016 yang akan dibentangkan di Parlimen menjelang hujung tahun ini.

Mengenai prospek bagi tahun 2016, pertumbuhan KDNK PKS dijangka kekal mampat sekitar 5.0 – 5.5% meskipun berdepan cabaran luar yang berterusan. Kerajaan akan terus komited dalam pembangunan PKS, dengan 125 program berjumlah RM4.4 bilion yang sedang dilaksanakan di bawah pelbagai Kementerian dan agensi, terutamanya dalam bidang pembiayaan, pembangunan modal insan, akses kepada pasaran dan penerapan teknologi / inovasi. Kaji selidik yang dijalankan oleh SME Corporation Malaysia menunjukkan PKS sedang menangani cabaran ekonomi semasa dengan mengambil langkah pengurangan kos, mencari pasaran baharu dan meningkatkan kecekapan untuk kekal berdaya saing.

Melangkah ke hadapan, orde dunia baharu kini sedang muncul yang akan membentuk landskap perniagaan. Trend utama yang akan mengubah perniagaan seluruh dunia termasuk Revolusi Industri 4.0, gabungan pendigitalan dan teknologi yang membawa kepada pertumbuhan syarikat Teknologi Kewangan, Penganalisa Data Besar dan e-dagang; serta integrasi serantau dan pembukaan pasaran. Apabila memasuki era baharu ini, PKS perlu menyesuaikan diri serta meraih manfaat. Tambahan pula, cabaran ekonomi telah berubah dengan wujudnya Komuniti Ekonomi ASEAN (*ASEAN Economic Community, AEC*) pada tahun 2015 dan komitmen kepada Perjanjian Perkongsian Trans-Pasifik (*Trans-Pacific Partnership Agreement, TPPA*) pada tahun 2018, yang akan mengembangkan potensi saiz pasaran kepada lebih 1 bilion untuk PKS Malaysia. Dengan itu, PKS perlu bangkit untuk bersaing di peringkat antarabangsa dan pada masa yang sama, mengekalkan citarasa tempatan – 'berfikir cara antarabangsa, bertindak cara tempatan (*think global, act local*)'.

Saya yakin kemajuan setakat ini menunjukkan daya tahan dan ketangkasan PKS Malaysia untuk mengubah perniagaan mereka dan melaraskan kepada trend baharu. PKS perlu merubah pemikiran mereka dan mengatasi halangan daripada gabungan cabaran ini yang merupakan tema kepada Laporan Tahunan PKS 2015/2016 – Mengatasi Halangan. Integrasi ke dalam rantai bekalan antarabangsa, memenuhi piawaian antarabangsa, penerapan amalan terbaik dan tadbir urus yang cekap akan membuka laluan bagi mewujudkan generasi baharu syarikat bertaraf dunia. Sektor awam juga sedang membuat penyesuaian supaya kekal relevan kepada keperluan PKS dan mewujudkan ekosistem yang kondusif kepada perniagaan. Tujuan dan aspirasinya tetap tidak berubah, supaya PKS kekal menjadi arus perdana dan trajektori pertumbuhannya dipercepatkan bagi meningkatkan sumbangan KDNK PKS kepada 41% dan sumbangan eksport kepada 23% menjelang 2020.



DATO' SRI MOHD NAJIB

Pengerusi Majlis Pembangunan PKS Kebangsaan
September 2016